

# ALL INDIA RADIO

RNU : KOLKATA

BENGALI BULLETIN

DATE :22-06-2018

TIME : 1.40 P.M.

দক্ষিণ-পূর্ব রেলের হাওড়া - খড়গপুর শাখার মেচেদা স্টেশনে আজ সকালে লাইন পেরোনোর সময় ট্রেনের ধাক্কায় এক ব্যক্তির মৃত্যু হলে উত্তেজনা ছড়ায়। স্থানীয় বাসিন্দারা জানিয়েছেন, আলম খান নামে ঐ ব্যক্তি সাইকেল নিয়ে লাইন পার হচ্ছিলেন। সেসময় সাঁতরাগাছিগামী একটি লোকাল ট্রেনের ধাক্কা লাগলে তিনি গুরুতর জখম হন। প্রায় ১ ঘন্টা ঐ অবস্থায় পড়ে থাকলেও রেল কর্তৃপক্ষ সহযোগিতা করেনি বলে অভিযোগ। ঘন্টাখানেক বাদে ঐ ব্যক্তির মৃত্যু হলে এলাকাবাসীরা ক্ষোভে ফেটে পড়েন। মৃতদেহ লাইনে ফেলে রেল অবরোধ শুরু হয়। ট্রেন লক্ষ্য করে ছোঁড়া হয় পাথর। প্রায় চার ঘন্টা অবরোধ চলার পর ১২টা নাগাদ অবরোধ উঠে যায়।

এদিকে মেচেদা স্টেশনে বিক্ষোভ অবরোধের জেরে সকাল ৭টা ৪০ মিনিট থেকে ট্রেন পরিষেবা ব্যাহত হয়। হাওড়া-খড়গপুর শাখার বিভিন্ন স্টেশনে আপ ও ডাউন দূরপাল্লার ১০টি ট্রেন আটকে পড়ে। ডাউন ব্যাঙ্গালুরু - গুয়াহাটি এক্সপ্রেস, স্টীল এক্সপ্রেস, চেন্নাই সেন্ট্রাল- সাঁতরাগাছি এ.সি. এক্সপ্রেস দাঁড়িয়ে যায়। অন্যদিকে, আটকে পড়ে আপ তাম্রলিঙ্গ, ইম্পাত, ফলকনুমা-সহ আরো কয়েকটি এক্সপ্রেস ট্রেন।

এছাড়াও ১৯টি লোকাল ও প্যাসেঞ্জার ট্রেনের পরিষেবাও বিঘ্নিত হয়। পৌনে ১টা নাগাদ ট্রেন চলাচল স্বাভাবিক হয় বলে দক্ষিণ-পূর্ব রেল সূত্রে জানানো হয়েছে।

০০০০০০

চীনা সরকারের আমন্ত্রণে সাড়া দিয়ে মুখ্যমন্ত্রী মমতা ব্যানার্জী, আজ ন'দিনের সফরে চীন যাচ্ছেন। তাঁর এই সফরে শিল্পে বিনিয়োগ এবং অর্থনৈতিক ও রাজনৈতিক বিভিন্ন কর্মসূচীও রয়েছে বলে সরকারি সূত্রে জানা গেছে। রাজ্যে চালু থাকা বিভিন্ন জনপরিষেবামূলক প্রকল্প নিয়েও চীন সরকার, মুখ্যমন্ত্রীর সঙ্গে আলোচনা করবে বলে কলকাতায় নিযুক্ত চীনের কনসাল জেনারেল মা-জানছ জানিয়েছেন। আজ রাতের বিমানে কলকাতা থেকে সিঙ্গাপুর হয়ে মুখ্যমন্ত্রী আগামীকাল চীনের রাজধানী বেজিং-এ পৌঁছোবেন।

০০০০০০

নিষেধাজ্ঞা অমান্য করে গভীর সমুদ্রে মাছ ধরতে গিয়ে দক্ষিণ ২৪ পরগণায় একটি ট্রলার ডুবির ঘটনায় নিঁখোজ ১০ মৎস্যজীবির মধ্যে ৩ জনের দেহ উদ্ধার হয়েছে। হারুদ পয়েন্ট উপকূল থানার পুলিশ, গতরাতে গভীর সমুদ্র থেকে তাদের দেহ উদ্ধার করে। ঝন্টু বিশ্বাস, প্রসেনজিত দাস ও মদন দাস নামে এই মৎস্যজীবীরা কাকদ্বীপের বাসিন্দা।

০০০০০০

দক্ষিণ কলকাতার বেহালার পর্ণশ্রীতে আড়াই বছরের শিশুকন্যাকে লাগাতার ধর্ষণের অভিযোগে পুলিশ তার মামাকে গ্রেপ্তার করেছে। স্বামীর সঙ্গে বনিবনা না হওয়ায়, শিশুটিকে নিয়ে তার মা বাপের বাড়ি থাকতেন। ব্যবসার কাজে তাঁকে বাইরে বেরোতে হয়। কিছুদিন ধরে মেয়ের শরীর খারাপ দেখে তাঁর সন্দেহ হয়। মেয়েকে জিজ্ঞেস করার পর, গতকাল তিনি ভাইয়ের নামে পুলিশে অভিযোগ জানান। পুলিশ ৪০ বছর বয়সী রামু সাহাকে গ্রেপ্তার করে।

অন্যদিকে, একই থানা এলাকায় মা-বাবার অনুপস্থিতির সুযোগ নিয়ে ১৬ বছরের নাতনির শ্লীলতাহানির অভিযোগে তার ঠাকুর্দাকে গ্রেপ্তার করা হয়েছে। ৬০ বছরের দিলীপ আচার্য এবং রামু সাহা দুজনকেই আজ আলিপুর আদালতে তোলা হবে।

০০০০০০

নদীয়ার রাণাঘাট হাসপাতালে আয়ার বিরুদ্ধে এক বৃদ্ধা রোগীকে শয্যা থেকে নামিয়ে মেঝেতে হাত বেঁধে রাখার অভিযোগ উঠেছে। রাধা বন্দ্যোপাধ্যায় নামে ঐ বৃদ্ধা, রাতে বারবার শয্যা থেকে নেমে যাওয়ার চেষ্টা করায়, অভিযুক্ত আয়া, তাঁকে মেঝেতে নামিয়ে, বেডের সঙ্গে হাত বেঁধে রাখে বলে অভিযোগ। হাসপাতালের সুপার সুদীপ্তকান্তি সরকার বলেন, ঐ আয়া হাসপাতালের নন। রোগীর বাড়ির লোকজন তাঁকে রেখেছিলেন। যদিও পরিবারের দাবি, নিয়মের তোয়াক্কা না করে হাসপাতালে আয়াদের রাজত্ব চলে। সুপারের কাছে আরতি নামে ঐ আয়ার বিরুদ্ধে লিখিত অভিযোগ জানানো হয়েছে।

০০০০০০

নদীয়ার হরিণঘাটা থানা এলাকার বড়জাগুলিতে আজ সকালে এক যুবকের মৃতদেহ উদ্ধারকে ঘিরে চাঞ্চল্য সৃষ্টি হয়। মৃত যুবকের নাম প্রদীপ বিশ্বাস। সিমহাটের বাসিন্দা, পেশায় গাড়ি চালক প্রদীপকে দুই অজ্ঞাতপরিচয় যুবক গতকাল বিকেলে বাড়ি থেকে ডেকে নিয়ে যায়। আজ সকালে কুটিরপাড়া এলাকায় একটি বাঁশ ঝোপের মধ্যে তাঁর ক্ষতবিক্ষত দেহ উদ্ধার হয়। পরিবারের অভিযোগ, প্রদীপকে ষড়যন্ত্র করে খুন করা হয়েছে।

০০০০০০

পরিবেশ দপ্তরের ছাড়পত্র না মেলার প্রতিবাদে বীরভূমের সমস্ত পাথর খাদান ৭দিনের জন্য বন্ধ রাখা হয়েছে। খাদান মালিকরা গতকাল এই সিদ্ধান্তের কথা ঘোষণা করেন। এরফলে লক্ষাধিক শ্রমিক সমস্যায় পড়েছেন।

উল্লেখ্য, ২০১৬ সালে জাতীয় পরিবেশ আদালত পাথর খাদান বন্ধের নির্দেশ দেয়। কিন্তু তা উপেক্ষা করেই এতদিন খাদানগুলিতে কাজ চলছিল। পরিবেশ আদালতের নির্দেশের কারণে খাদান মালিকের থেকে সরকার কর নিতে পারছিল না। তবে বেআইনীভাবে তাদের কাছে থেকে টাকা আদায় করা হচ্ছিল বলে খাদান মালিকদের অভিযোগ। এর প্রেক্ষিতেই তারা আপাতত ৭দিনের জন্য এই সিদ্ধান্ত নিলেন।

০০০০০০

কলকাতার বিভিন্ন পানশালায় মুস্বাই থেকে মাদক সরবরাহের অভিযোগে পুলিশ গতকাল দুজনকে গ্রেপ্তার করে। পার্ভেজ আহমেদ ও মেহেবুব আলম নামে ঐ দুজনের কাছ থেকে ১০ গ্রামেরও বেশি মাদক পাওয়া গেছে। এর দাম প্রায় ৪ লাখ টাকা।

০০০০০০

উত্তরবঙ্গের জেলাগুলিতে কোথাও কোথাও আজও বজ্রবিদ্যুত-সহ প্রবল বৃষ্টির পূর্বাভাস রয়েছে। কোচবিহারে গতসন্ধ্যায় বজ্রবিদ্যুত-সহ মুঘলধারে বৃষ্টি নামে। শহরের পথঘাটে জল জমে যায়। আজ সকালেও জেলার বিভিন্ন স্থানে বৃষ্টি হয়।

এদিকে, পূর্ব মেদিনীপুরের পটাশপুরের গোকুলপুর এলাকায় বাজ পড়ে এক ব্যক্তির মৃত্যু হয়েছে। আলিপুর আবহাওয়া দপ্তরের সর্বশেষ রেডার পর্যবেক্ষণে

জানানো হয়েছে, আগামী ২ থেকে ৩ ঘন্টায় দুই ২৪ পরগণায় বজ্রবিদ্যুত-সহ হালকা থেকে মাঝারি বৃষ্টিপাত হতে পারে।

০০০০০০

বিশ্বকাপ ফুটবলে গ্রুপ-ই-র ম্যাচে আজ ব্রাজিল, কোস্টারিকার মুখোমুখি হবে। খেলা শুরু, ভারতীয় সময় বিকেল সাড়ে ৫ টায়।

গ্রুপ-ডি-র ম্যাচে রাত সাড়ে ৮টায় নাইজেরিয়া, আইসল্যান্ডের এবং গ্রুপ-ই-র অন্য ম্যাচে রাত সাড়ে ১১টায় সার্বিয়া, সুইজারল্যান্ডের বিরুদ্ধে খেলতে নামবে।

-----